

Beth y Jug Twitty no ta culpa Aruba pa desaparicion di nan yiu

Nan kier pa e caso worde resolvi pronto



ORANJESTAD(AAN): Durante di e entrevista cu DIARIO a tene cu Mama y padraastro di Natalee Holloway den fin di siman, e mama a bisa cu e ta disgusta, asombra y devasta, cu e echo cu Joran van der Sloot kende tin solamente 17 aña di edad tabata permiti di drenta Carlos & Charlies y cu despues e lo a bay cu Natalee, cu e consecuencia cu awor Natalee ta perdi.

El a bisa cu riba casi tur Web Site di e establecimiento bo por mira Joran, como si fuera cu e ta e modela, pa cu e lugar.

Padraastro di Natalee Jug Twitty a conta DIARIO cu riba e prome anochi cu nan tabata na Aruba, nan a bay Carlos & Charlies, pa wak con e lugar ta.

Segun Jug, el a wak cu tabata tin dos pelea den e lugar y el a conclui tambe cu esaki ta un lugar, unda cu mucha muherman hoben tin cu paga un tino, mirando tambe e diferente sorto di alcohol cu por haya y e ambiente di fi-

esta cu ta reina.

Jug a sigui bisa tambe cu e ta lamenta cu ningun hende di Carlos & Charlies a bin dilanti pa bisa sorry, of ofrece ayuda den cualkier forma.

Por ehempel e tabata spera pa gerencia laga nan papia cu e bartendernan cu lo a wak of sirbi Natalee, of conoce Joran, Deepak of Satish, pa asina nan por a hasi nan diferente pregunta.

Segun Beth, mirando cu bo ta wak Joran riba tur e website nan, e trahadornan di C & C mester a conoce y por a bin dilanti pa conta nan por ehempel con su comportacion tabata, y con hopi e tabata frecuente e establecimiento.

DIARIO a puntra Beth kiko e ta kere a sosode riba e anochi di desaparicion di su yiu.

Beth y Jug a splica cu nan ta basta sigur cu probablemente Joran tabata cumpra bebida pa Natalee y cu Joran lo a probecha di e echo cu Natalee ta basta ingenuo y ta pa e motibo ey el a scoge Natalee, pa asina e por a bay cune.

Segun e padraastro e echo Joran y e rumannan Kalpoe a gaña na prome instancia y a mantene esaki pa e prome 9 dia, ta un indicacion cu algo malo lo a pasa.

Tambe e mama a bisa cu e echo cu Joran a admiti di a tene relacion sexual cu su yiu muher, ta muestra cu e ta culpabel por lo menos di

violacion, pasobra e sa cu su yiu tabata virgen ainda.

El a bisa tambe cu e ta kere cu Paul van der Sloot a coach e muchanan pa bisa loke nan a bisa.

DIARIO a puntra e pareha nan reaccion riba diferente



rumor cu ta bisa cu Natalee mes lo a scoge di keda scondi, pa motibo entre otro cu e lo tabata tin problemanan serio cu su padraastro, of otro motibonan pa core bay.

Mama di Natalee a asegura DIARIO cu esaki no ta berdad y cu hamas Natalee tabata tin un historia di huy, of cualkier otro problema cu su famia.

E mama a laga nos saca potret di pertenencianan di Natalee Holloway, cu ta inclui su tas cu el a laga prepara pa bolbe bek Merca y su cartera.

Den e cartera tabata tin algun biyete di 1 dollar y e mama a bisa cu Natalee no tabata tin un Credit Card.

Beth a splica cu henter e asunto ta hopi dificil, unda cu

for di un principio te aworaki, ta costando e famia hopi placa, sin embargo nan



lo hasi cueste loke cueste pa haya nan yiu bek.

Beth y Jug a enfatiza cu nan ta hopi agradeci na ciudadanonan di Aruba; cu ta yudando nan den diferente forma cu buskeda di Natalee. E famia a expresa di a keda hopi impresiona y conmovi cu e cadena humano riba Diahuebs entre Holiday Inn y Wyndham.

Beth a bisa tambe cu e ta aprecia masha hopi mes cu pueblo di Aruba na varios ocasion a reza pa regreso di su yiu.

Padraastro di Natalee a bisa tambe cu e comportacion di tata di Joran van der Sloot ta laga hopi di deseya.

El a bisa cu si e tabata e tata di Joran den e asunto aki y e tabata sigur cu su yiu tabata inocente, e lo a coopera totalmente for di un comienzo y hasi un esfuerzo extra pa bin cu e detayenan di loke a sosode e anochi.

Sin embargo Jug ta splica cu segun e, e tata a conseha e hobennan con pa gaña.

E mama a bisa cu e dia cu nan

a bay cas di Paul van der Sloot ultimo biaha y a combersa cune, nan a haya hopi straño con hopi van der Sloot tabata soda.

Beth a splica cu Paul tabata soda asina hopi, cu esaki tabata lek riba vloer y su señora mester a coi un serbete, pa e seca su cara.

DIARIO a puntra reaccion di e pareha riba e echo cu diferente medianan di prensa internacional y Mericanonan riba internet, ta papia malo di Aruba, relaciona cu e caso aki.

Padraastro di Natalee a bisa cu e lo ta prome den bisa prensa internacional cu no mester culpa pueblo di Aruba pa loke lo a sosode cu Natalee.

Sin embargo segun e pareha, nan ta haya cu na comienzo di e caso algun fout a wordo hasi pa husticia, sin embargo apesar cu nan mester keda kere den regreso di un Natalee bibo, nan kier yega na fin di e caso.

E pareha a bisa cu nan a yega awor den un fase cu nan ta existi pa Cuerpo Policial yega na un conclusion di e caso, pa nan por haya nan yiu sano y salvo y si acaso nan yiu no ta na bida mas, nan lo kier haya sa esaki, pa nan por pone su curpa sosega y wak con nan lo sigui cu nan bida.

Sin embargo nan no kier pensa riba e ultimo opcion, pasobra e dolor lo ta immenso.

Beth Twitty a conta cu ta hopi tristo y ironico, cu net e aña aki, cu el a cancela e lesnan cu e tin ta duna pa añanan caba, pa e por pasa mas tempo cu Natalee e zomer aki, e ta desaparece.

TELEFONAN DI DIARIO
582-6747 - FAX 582-8551